

თბილისის `დინამომ` მოუგო მოსკოვის `სპარტაკს`

თბილისის `დინამოს` და მოსკოვის `სპარტაკის` გუნდები ერთერთი მთავარი პრეტენდენტებია `საბჭოთა კავშირის თასის`.

16 აგვისტოს მოსკოვში მოხდა აღნიშნული გუნდების შეხვედრა. გამარჯვება უფლებას იძლეოდა ნახევრად ფინალში გამოსვლისა, დამარცხებულ გუნდს გზა ელობებოდა პირველობისაკენ.

თბილისელებმა თამაში მეტად ენერგიულად დაიწყეს. საუკეთესოდ თამაშობენ მცველები, განსაკუთრებით შ. შავგულიძე.

`სპარტაკმა` დიდხანს ვერაფერი გააწყო. თერთმეტმეტრიან თავისუფალი დარტყმიდან გატანილი ბურთი თბილისის ფეხბურთელებმა 29 წუთზე გაქვითეს.

სამი წუთით ადრე ტაიმის დამთავრებამდე თბილისელების ბადეში მეორე ბურთი შევარდა, ისიც თერთმეტი მეტრიდან დარტყმული, ანგარიშია 2:1. ერთი წუთის შემდეგ თბილისის ჭიშკარში მესამე ბურთმა გაიარა.

1:3 წააგეს თბილისელებმა თამაშის პირველი განყოფილება. შეჯიბრების ბედი თითქოს გადაწყვეტილი იყო. რას შეეძლო დამარცხებისაგან ეხსნა თბილისის გუნდი?

13 წუთით ადრე თამაშის დამთავრებამდე `სპარტაკის` ბადეში შევარდა მეორე ბურთი. ანგარიშია 3:2. თამაში მწვავე ხასიათს ღებულობს. ორი წუთით ადრე შეჯიბრების შეწყვეტამდე თბილისელები ურტყამენ `პენალტს`. ანგარიში გაქვითებულია. წესის თანახმად, მსაჯმა უნდა დანიშნოს დამატებითი დრო, მაგრამ ბნელა, თამაშის გაგრძელება აღარ შეიძლება. მატჩი გადათამაშებულ იქნება.

20 აგვისტოს თბილისის `დინამო` და მოსკოვის `სპარტაკი` კვლავ შეხვდნენ ერთმანეთს. შეჯიბრება დამთავრდა თბილისელების ბრწყინვალე გამარჯვებით 6:3.

ამრიგად, თბილისელი ფეხბურთელები გამოვიდნენ `საკავშირო თასის` გათამაშების ნახევრად ფინალში. გამარჯვებულ გუნდს შეჯიბრება ექნება მოსკოვის `დინამოსთან`, როცა ეს უკანასკნელი ჩეხოსლოვაკიიდან დაბრუნდება.

“კომუნისტი”, 22 აგვისტო, 1936